



Broj/Broj: 4/1-50-1-83-27/05
Sarajevo/Sarajevo, 18.11.2005. godine

ZAPISNIK

27. sjednice Zajedničke komisije Parlamentarne skupštine BiH za odbranbeni i sigurnosnu politiku i nadzor nad radom odbrambenih i sigurnosnih struktura na nivou BiH

Sjednica je održana 18.11. 2005. godine, u vremenu od 10,45 do 12,20 sati.

Sjednici su prisustvovali članovi Zajedničke komisije:

Boško Šiljegović, Seada Palavrić, Vinko Radovanović, Adem Huskić, Momčilo Novaković, Branko Zrno i Halid Genjac.

Iz opravdanih razloga, sjednici nisu prisustvovali: Šefik Džaferović, Anto Spajić, Vinko Zorić, Osman Brka, te Mirko Blagojević.

Sjednici su također prisustvovali gosti: u ime Međunarodnog centra za obuku za podršku mirovnim operacijama - Butmir (PSOTC) - komandant brig. general Henning Broechman Larsen s prevodiocima; u ime OSCE-a Christijan Haupt; u ime DGS-a Vahid Alagić, zamjenik direktora DGS-a; u ime Ministarstva sigurnosti BiH Ljiljana Trišić, pomoćnik ministra sigurnosti; Željko Grubešić, ekspert za vojna i sigurnosna pitanja; volonter Anđelka Dobrilović, iz Istraživačkog centra PSBiH, i Albina Ibrahimagić, volonter u PSBiH. Sjednici Zajedničke komisije za odbranbeni i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine predsjedavao je predsjedavajući Boško Šiljegović.

Za sjednicu je predložen

DNEVNI RED

1. Prezentacija inicijativa u vezi s obukom koje provodi Međunarodni centar za obuku za podršku mirovnim operacijama-Butmir (PSOTC)-komandant brig. general Henning Broechman Larsen;
2. Informacija o stanju popunjenosti Državne granične službe BiH i internoj kontroli (Ministarstvo sigurnosti BiH i DGS);
3. Tekuća pitanja:
 - a) Informacija o realizaciji zaključka Zajedničke komisije za prijem Bosne i Hercegovine u članstvo Vijeća zaklade Ženevskog centra za sigurnosnu politiku;
 - b) Izvještaji sa službenih putovanja i održanih sastanaka;
 - c) Ostala pitanja.

Dvadeset sedmu sjednicu Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine otvorio je predsjedavajući Boško Šiljegović te zaželio dobrodošlicu komandantu brigadnom generalu Henningu Broechmanu Larsenu. Potom se prešlo na razmatranje prve tačke dnevnog reda.

Ad-1. Nakon uvodnog izlaganja, Boško Šiljegović pozvao je komandanta brigadnog generala Henninga Broechmana Larsena da prezentira inicijative u vezi s obukama koje provodi Međunarodni centar za podršku mirovnim operacijama-Butmir (PSOTC). Nakon uspješne prezentacije, predsjedavajući Zajedničke komisije zahvalio je brigadnom generalu i iznio rezime svih aktivnosti koje je Zajednička komisija do sada imala, a koje su uspješno realizirane.

U diskusiji o ovoj tački dnevnog reda učestvovali su: Seada Palavrić, koja je istakla svoj boravak u Međunarodnom centru za podršku mirovnim operacijama-Butmir, pozitivne utiske koje je tom prilikom stekla, te izrazila podršku radu Međunarodnog centra, i Vinko Radovanović, koji je brigadnom generalu Henningu Broechmanu Larsenu postavio nekoliko pitanja, i to: da li će Međunarodni centar koristiti iskustva ljudi koji su bili angažirani u mirovnim misijama u kojima učestvuju Bosna i Hercegovina; kako će se Međunarodni centar finansirati kada ga preuzme Bosna i Hercegovina; s obzirom na ulogu Parlamentarne skupštine BiH u slanju mirovnih misija, da li brig. general smatra da bi članovi Zajedničke komisije trebalo da imaju aktivnu ulogu u radu Međunarodnog centra putem predavanja polaznicima o značaju i ulozi Parlamentarne skupštine BiH; te da li je na obukama koje vrši Međunarodni centar bilo polaznika iz policije i, ako nije, da li je u planu njihova obuka, s obzirom da u mirovnim misijama Bosne i Hercegovine učestvuju i policijski službenici?

Na postavljena pitanja brigadni general Henning Broechman Larsen odgovorio je redoslijedom kako su postavljena, naglasivši da osoblje Međunarodnog centra ima iskustvo u radu mirovnih misija, s obzirom da su mnogi bili članovi međunarodnih mirovnih misija, kao i da su mnogi školovani u inozemstvu, te da će sigurno, nakon povratka članova Mirovne misije u Iraku, komandanti biti angažirani da održe predavanje o radu u timu multilateralnih snaga prisutnih u toj zemlji nižim oficirima koji nemaju iskustva u toj oblasti. U vezi s finansiranjem Međunarodnog centra u budućnosti, naveo je podatak da se planira povećavanje budžeta svake godine, a da je Ministarstvo odbrane BiH preraspodijelilo sredstva koja će se koristiti za rad ovog centra u naredne tri godine i postepeno, kako se budu prenosile nadležnosti, odnosno povlačili iz centra, budžet će se povećavati, s tim da će međunarodna zajednica finansijski biti prisutna sigurno još pet do sedam godina. U vezi sa saradnjom s Parlamentarnom skupštinom BiH, naglasio je da sigurno ima tema zbog kojih bi predavači mogli biti angažirani iz Parlamentarne skupštine BiH, što je praksa u drugim državama, npr. u Danskoj. U vezi s uslugama i obukom drugih struka, naglasio je da je Međunarodni centar otvorenog tipa i u njemu se mogu školovati svi za koje se smatra da postoji potreba, posebno naglasivši da je plan i program atraktivan za one koji se bave vanjskom politikom i međunarodnim odnosima.

Pošto nije bilo više pitanja, predsjedavajući je zahvalio brigadnom generalu i dao desetominutnu pauzu kako bi se prisutni članovi Zajedničke komisije mogli pozdraviti s uvažnim gostom.

Nakon pauze, predsjedavajući je predložio dnevni red, te pozvao prisutne da daju svoje primjedbe i sugestije o ostalim tačkama predloženog dnevnog reda.

Također, predsjedavajući je predložio da se uradi analiza prisustva članova Zajedničke komisije sjednicama koja bi se razmatrala na radnom sastanku koji će biti posebno za to organiziran. Prisutni su jednoglasno usvojili **zaključak:**

Zadužuje se sekretar Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine da napravi pregled prisustva, odnosno odsustva članova Zajedničke komisije sjednicama, s podacima gdje su u vrijeme

odsustva bili angažirani, kako bi se mogao održati radni sastanak na kojem će se razmotriti angažiranost članova Zajedničke komisije u njenom radu.

Pošto nije bilo primjedbi i sugestija, predloženi dnevni red jednoglasno je usvojen.

Ad-2. Uvodno izlaganje o ovoj tački dnevnog reda imao je Boško Šiljegović. Obrazloženje je dao Vahid Alagić, koji je rekao da veliki problem u radu DGS-a predstavljaju i podzakonski akti koji do danas nisu doneseni.

U raspravi o ovoj tački dnevnog reda učestvovali su: Boško Šiljegović, koji je naglasio podršku Zajedničke komisije radu DGS-a i potrebu da se apelira na Vijeće ministara BiH da što prije donese pomenute akte; Christijan Haupt, koji je od Vahida Alagića tražio da tačno navede probleme s međunarodnom zajednicom da bi se moglo djelovati, te upitao da li postoje područja u graničnom dijelu koja su minirana i zbog kojih se ne može ostvarivati puna kontrola granice. Vahid Alagić naglasio je da u svom izlaganju nije pominjao međunarodnu zajednicu, već da se njegovo izlaganje odnosilo na IPTF, koji je utvrdio broj ljudi koji nije u skladu s međunarodnim standardima, koji u ovakvim slučajevima predviđaju više zaposlenih nego što je to odredio IPTF (po IPTF-u, maksimalno 2500) kao i certifikate koje je izdao IPTF ljudima koji ne ispunjavaju uslove za obavljanje poslova i zadataka u DGS-u. Kao poseban problem naveo je Pravilnik o činovima koji još nije donijelo Ministarstvo sigurnosti BiH, pa je naglasio potrebu da se što prije donese ovaj akt, naglasivši da, koliko mu je poznato, duž granice nema opasnosti od mina, već tu postoje drugi problemi, kao što je nenaseljenost. Ljiljana Trišić navela je da je u proceduri donošenje nekoliko akata, te istakla dug proces kad se radi o činovima. Seada Palavrić istakla je da nema opravdanja za nepoštovanje zakonskih rokova i kašnjenje u donošenju podzakonskih akata. Adem Huskić podsjetio je na razgovor s predstavnicima DGS-a tokom posjete Zajedničke komisije Terenskom uredu DGS-Jug Čapljina, te naglasio tom prilikom utvrđene zaključke koji su usmjereni ka Parlamentarnoj skupštini BiH i u vezi s tim upitao da li je DGS njima zadovoljan, pa, u skladu s diskusijom, naglasio problem gradnje u pograničnom području i nedostatak podzakonskih akata, predloživši da DGS sačini materijal u kojem će navesti navedenu problematiku i uputiti ga Komisiji da bi se tražila sredstva od EU za njihovo rješavanje. Predložio je da se Informacija o stanju popunjenosti DGS-a i internoj kontroli prihvati i uputi u parlamentarnu proceduru. Boško Šiljegović pročitao je zaključke utvrđene prilikom posjete Zajedničke komisije Terenskom uredu DGS-Jug Čapljina i predložio da se Informacija primi k znanju i zajedno sa zaključcima proslijedi Parlamentarnoj skupštini BiH.

Članovi Zajedničke komisije potom su jednoglasno usvojili sljedeći **zaključak**:

Prima se k znanju Informacija o stanju popunjenosti Državne granične službe BiH i internoj kontroli, broj: 06-50-2863-1/05, od 6.10.2005. godine, čiji sastavni dio čine zaključci utvrđeni prilikom posjete Terenskom uredu DGS-Jug Čapljina 9. i 10. novembra 2005. godine.

Ad.3.

a) Informacija o radionici o temi: "Budžet odbrane u 2006. godini", održanoj 11.11.2005. godine u Neumu

Uvodno izlaganje o ovoj tački dnevnog reda dao je Boško Šiljegović. Obrazloženje uz ovu tačku dao je Željko Grubešić.

Rasprave nije bilo, pa su prisutni jednoglasno usvojili Informaciju s utvrđenim zaključcima koji čine njen sastavni dio.

Također, sekretar Zajedničke komisije zadužen je da, zajedno sa Željkom Grubešićem, navedenu informaciju dostavi nadležnim organima.

b) Informacija o uvozu – izvozu oružja

S obzirom da nije bilo predlagača, Informacija je skinuta s dnevnog reda.

c) Izvještaj o učešću Željka Grubešića na 7. DCAF radnom seminaru, održanom u Berlinu od 24. do 28. oktobra 2005.

Uvodno izlaganje o ovoj tački dnevnog reda imao je Boško Šiljegović. Rasprave o ovoj tački nije bilo, pa su prisutni jednoglasno primili k znanju ovaj izvještaj.

d) Informacija o realizaciji zaključka Zajedničke komisije za prijem Bosne i Hercegovine u članstvo Vijeća zaklade Ženevskog centra za sigurnosnu politiku

Uvodno izlaganje o ovoj tački dnevnog reda imao je Boško Šiljegović. Istaknuo je da je na insistiranje Zajedničke komisije reliziran njen zaključak i da će naša zemlja konačno biti primljena u članstvo Ženevskog centra za sigurnosnu politiku.

U vezi s ovim pitanjem, Željko Grubešić informirao je prisutne da će Bosna i Hercegovina zvanično 6.12.2005. postati član Vijeća zaklade Ženevskog centra za sigurnosnu politiku (GCSP).

Rasprave o ovoj tački dnevnog reda nije bilo i ona je primljena k znanju.

e) Izvještaj o seminaru "Evropska sigurnosna i odbrambena politika", u organizaciji RACVIAC-a, od 29. do 30.11.2005. godine

Boško Šiljegović predložio je da se na seminar "Evropska sigurnosna i odbrambena politika" koji treba da bude održan u Zagrebu, Republika Hrvatska, od 29. do 30.11.2005., u ime Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine upute Adem Huskić i Branko Zrno. Prijedlog je jednoglasno prihvaćen.

f) Ostala pitanja:

1. Boško Šiljegović predložio je da se do kraja godine sačini plan aktivnosti Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine, nakon čega je jednoglasno usvojen **zaključak**:

Zadužuje se sekretar Zajedničke komisije da za narednu sjednicu sačini plan aktivnosti Komisije, zaključno s 31.12.2005. godine, koji će usaglasiti sa Željkom Grubešićem.

2. Seada Palavrić tražila je da joj se odgovori kad se vraćaju članovi Mirovne misije u Iraku i da li će im članovi Zajedničke komisije prirediti doček. Željko Grubešić informirao je prisutne da se članovi Mirovne misije vraćaju 24.11.2005. , a predsjedavajući Zajedničke komisije da je planiran doček o kojem će članovi biti naknadno informirani.

3. Boško Šiljegović informirao je prisutne o isteku mandata Komisiji za reformu odbrane, te razgovoru s Željkom Grubešićem u vezi s organizacijom prijema kao i zvanicama na prijemu koji bi bio organiziran poslije 16.12.2005. , a za šta mu je potrebna saglasnost prisutnih. Prisutni su jednoglasno dali svoju saglasnost da Zajednička komisija bude organizator prijema, te u vezi s tim usvojili **zaključak**:

Zadužuje se sekretar Zajedničke komisije da, u saradnji sa Željkom Grubešićem, vojnim ekspertom, i Christijanom Hauptom utvrdi listu zvanica, te protokolarni i tehnički dio organizacije prijema.

Christijan Haupt dat će podatke o datumu za koji se najkasnije, s obzirom na zvanice, može planirati prijem.

Zadužuje se sekretar Zajedničke komisije za odbrambenu i sigurnosnu politiku i nadzor nad radom odbrambenih i sigurnosnih struktura na nivou Bosne i Hercegovine da prijedlog o organizaciji prijema dostavi kolegijima domova.

4. Christijan Haupt informirao je prisutne o doniranoj opremi koja je data krajnjem korisniku, te organizaciji ceremonije u vezi s njenom zvaničnom primopredajom. Boško Šiljegović predložio je da se tom prilikom osigura prisustvo medija. Prisutni su jednoglasno usvojili zaključak:

Zadužuje se sekretar Zajedničke komisije da, u saradnji sa Željkom Grubešićem, osigura prisustvo medija zvaničnoj primopredaji donirane opreme.

5. Boško Šiljegović informirao je prisutne da sa Zakonom o odbrani BiH i Zakonom o službi u OSBiH ima tehničkih problema, te da su izvještaji u vezi s intervencijama na zakone išli na Kolegij, ali s obzirom na lošu pripremu u Vijeću ministara BiH, rok od 1.12.2005. nije izvjestan za stupanje na snagu ovih zakona.

6. U vezi s odlaskom u Bugojno, 7.12.2005. , radi posjete LOT kućama švicarske vojske i posjete jednoj fabrici namjenske industrije, prisutni su informirani da ne postoje uslovi da Zajednička komisija ide u kompletnom sastavu, pa su jednoglasno odlučili da posjetu realiziraju: Boško Šiljegović, Adem Huskić, Anto Spajić, Dragica Hinić i Željko Grubešić.

7. Boško Šiljegović predložio je da se u aktivnosti Zajedničke komisije za 2006. uključi sastanak s predstavnicima civilne zaštite Federacije BiH i Republike Srpske. Prisutni su jednoglasno usvojili ovaj prijedlog.

Sekretar :
Dragica Hinić

Predsjedavajući
Zajedničke komisije:
Boško Šiljegović